

# BARAZA LA WAWAKILISHI ZANZIBAR

Simu Nam. + 255 24 2230602/1  
Fax Nam. + 255 24 2230215  
Tovuti: [www.zanzibarassembly.go.tz](http://www.zanzibarassembly.go.tz)



SANDUKU LA BARUA 902,  
ZANZIBAR  
Barua Pepe: [zahore@zanlink.com](mailto:zahore@zanlink.com)

## HOTUBA YA MAONI YA KAMATI YA KUSIMAMIA AFISI ZA VIONGOZI WAKUU WA KITAIFA KUHUSIANA NA UTEKELEZAJI WA MAAGIZO YA KAMATI YA MWAKA 2016/17 KWA OFISI YA MAKAMO WA PILI WA RAIS

**Mheshimiwa Spika,**

Nianze kwa kupeleka shukurani zangu za dhati kwa Allah (S.W), mwingi wa utukufu na rehema, kwa kutujaalia pumzi na Afya njema, na kuweza kutukutanisha tena katika Baraza hili tukufu, kwa lengo la kuendelea kuwatumikia wananchi wetu wa Zanzibar. Aidha natumia fursa hii kukushukuru na kukupongeza wewe **Mheshimiwa Spika**, kwa namna unavyoliongoza Baraza hili kwa uweledi mkubwa uliojaa busara na hekima wakati unapoliongoza Baraza lako, ni imani yangu kwamba, utaendelea kuliongoza Baraza hili kwa uadilifu wa hali ya juu wewe na wasaidizi wako kwa lengo la kuimarisha Demokrasia katika chombo hiki muhimu cha wananchi.

**Mheshimiwa Spika,**

Pia nachukua fursa hii, kumshukuru na kumpongeza kwa dhati Mhe. Rais wa Zanzibar na Mwenyekiti wa Baraza la Mapinduzi, Mhe. Dkt. Ali Mohammed Shein, kwa kuiongoza nchi yetu, kwa hekima, busara na uadilifu mkubwa kwa kipindi chake chote tokea kushika nafasi ya uraisi kwa kipindi chote cha utumishi wake wa urais. Hekima na Busara zake anazoitumia katika kuiongoza nchi yetu, ndizo ambazo zimetufanya hadi leo kuweza kuishi kwa Amani, umoja na utulivu wa hali ya juu. Tunakuomba Mwenyezi Mungu umuongezee nguvu, hekima na busara Zaidi ili azidi kutuiongoza kwa umakini na kufikia malengo tuliyokusudia.

Sina budi pia kumshukuru na kumpongeza Makamo wa pili wa Rais, Mhe. Balozi Seif Ali Iddi, kwa umahiri wake mkubwa wa kuyasimamia vyema majukumu ya Wizara zote za Serikali na kumsaidia kwa umakini mkubwa Mhe.Rais wa Zanzibar na Mwenyekiti wa Baraza la Mapinduzi hivyo kuweza kufikia malengo tuliyokusudia ya kuwatumikia wananchi kwa utumishi ulio bora na ni imani yangu kwamba wananchi wetu Zanzibar kwa ujumla wao wanafurahia kazi kubwa zinazofanywa na serikali yetu ambyo inasimamia sera za Chama Cha Mapinduzi.

Pia nimshukuru sana, Waziri wa Nchi, Ofisi Makamu wa Pili wa Rais, Mhe.Mohammed Aboud, pamoja na watendaji wake wote, wakiongozwa na Katibu Mkuu wa Wizara hiyo, kwa mashirikiano waliyotupatia wakati tukizipitia taarifa za utekelezaji wa Wizara hii. Mashirikiano wanayotupatia ndio moja kati ya sababu kubwa kwamba Kamati yetu kuweza kukamilisha kazi iliyojipangia bila ya kikwazo.

**Mheshimiwa Spika**, sina budi kutumia fursa hii kumpongeza kwa dhati Dkt Idrisa Muslim Hija kwa kuteuliwa kuwa Katibu Mkuu Katika Wizara hii. Namtakia kila la kheri na mafanikio katika kutekeleza majukumu yake ya kila siku. Ni imani ya Kamati yetu kwamba kwa umahiri wake mkubwa kijiti alichokabidhiwa na mtangulizi wake ataiwezesha wizara kufikia malengo yaliyokusudiwa ya kuwatumikia wananchi wetu wa Zanzibar ukitilia maana kwamba wizara aliyokabidhiwa ndio mama wa wizara nyengine za Serikali yetu.

Lakini pia kwa namna ya upekee, nawashukuru Wajumbe wote wa Kamati ya Kusimamia Ofisi za Viongozi Wakuu wa Kitaifa kwa kazi zao nzuri wanazozifanya wakati wote wa kazi za kamati, jambo ambalo imekuwa ni wepesi kwangu kuweza kuiongoza kamati hii. Wajumbe wameonesha umahiri na umakini wa hali ya juu, na wameweza kuijadili ipasavyo taarifa hii ya utekelezaji na kuhoji mambo mengi ya msingi, kwa lengo la kuhakikisha kuwa fedha zinazoidhinisha katika Baraza hili, zinatumika vizuri na kwa maslahi mapana kwa ajili ya wananchi wa Zanzibar.

**Mheshimiwa Spika,**

Napenda kutumia fursa hii pia, kuwapongeza na kuwashukuru Wawakilishi wote waliomo katika Baraza lako Tukufu, kwa kuendelea kuwawakilisha na kuwatumikia wananchi waliowachagua. Ni wazi kwamba wananchi wamejenga imani kubwa kwetu, nasi hatuna budi kurejesha imani kwao, kwa kuwatumikia kwa dhati na kwa moyo wetu wote, kwa dhamira na lengo la kuleta maendeleo ya nchi yetu kwa ajili ya maslahi ya wananchi wetu wote tunaowawakilisha katika Baraza hili tukufu.

### **Mheshimiwa Spika,**

Kabla ya kuendelea na hotuba hii, kwa ruhusa yako, na kwa heshima ya kipekee naomba niwatambua Wajumbe wa kamati ya Kusismamaia Ofisi za Viongozi Wakuu wa Kitaifa kama ifuatavyo:-

- |                                       |              |
|---------------------------------------|--------------|
| 1. Mheshimiwa Omar Seif Abeid         | Mwenyekiti   |
| 2. Mheshimiwa Panya Ali Abdallah      | M/Mwenyekiti |
| 3. Mheshimiwa Amina Iddi Mabrouk      | Mjumbe       |
| 4. Mheshimiwa Ame Haji Ali            | Mjumbe       |
| 5. Mheshimiwa Hussein Ibrahim Makungu | Mjumbe       |
| 6. Mheshimiwa Mussa Ali Mussa         | Mjumbe       |
| 7. Mheshimiwa Mtumwa Suleiman Makame  | Mjumbe       |

Aidha Kamati hii inafanyakazi na makatibu wawili ambao wamekuwa wakitusaidia na kutushauri kwa karibu sana na kwa kiasi kikubwa na kwa uweledi wa hali ya juu katika kutekeleza majukumu yetu ambayo yametupatia Kamati hii heshima na mafanikio makubwa. Makatibu hao ni:-

- |                            |        |
|----------------------------|--------|
| 1. Ndg. Karima Abdul-Wahab | Katibu |
| 2. Ndg. Talib Enzi Enzi    | Katibu |

### **Mheshimiwa Spika,**

Ni jambo la lazima kwa kila wizara kuwasilisha mbele ya Baraza Taarifa ya utekelezaji wa maagizo ya Kamati katika Mkutano wa Baraza wa mwezi wa Septemba au Oktoba kwa kila mwaka. Kwa mujibu wa Kanuni ya 108(15) Taarifa ya utekelezaji wa maagizo ya Kamati ni lazima kwanza iwasilishwe katika Kamati za Kudumu za Baraza

zinayosimamia Wizara hizo kabla ya kuwasilishwa katika Baraza. Kwa hivyo Kamati ya Kusimamia Viongozi wakuu wa Kitaifa inawasilisha mbele ya Baraza lako tukufu taarifa hii ikiwa ni utekelezaji wa wajibu wake kwa mujibu wa Kanuni ya 108(15) ya Kanuni za Baraza la Wawakilishi.

**Mheshimiwa Spika,**

Taarifa hii ya utekelezaji inatokana na Maagizo ya Kamati yaliyojitokeza baada Kamati kuwasilisha ripoti yake ya utekelezaji wa Wizara na kujadiliwa na Baraza katika Mkutano wa Mwezi Febuari.

Katika Bajeti ya 2016/17 Kamati yangu ilitoa maagizo kadhaa kwa Taasisi inazosisimamia. Hivyo taarifa hii inatoa hali halisi ya utekelezaji wa maagizo hayo, kwa upande wa ofisi ya Makamu wa Pili wa Rais kwa mwaka wa fedha 2016/17 iliagizwa na Kamati kutekeleza maagizo Thelathini na tatu (33) ambayo yalielekezwa kuchukuliwa hatua kupitia Idara tofauti, ambapo kwa mgawanyo wa Kiidara ni kama ifuatavyo:

- i) Tume ya Kitaifa ya Uratibu wa Dawa za kulevya, Maagizo saba (7)
- ii) Tume ya Uchaguzi, maagizo matano (5)
- iii) Wakala wa Serikali wa Uchapaji Zanzibar, maagizo manne (4)
- iv) Kamisheni ya Kukabiliana na Maafa, maagizo matatu (3)
- v) Tume ya UKIMWI, maagizo matatu (3),
- vi) Idara ya Uratibu wa Masuala ya SMZ na SMT na masuala ya Muungano, maagizo matatu (3)
- vii) Afisi ya Uratibu wa shughuli za SMZ -DSM, maagizo manne (4)
- viii) Idara ya watu wenye ulemavu, maagizo manne (4)
- ix) Idara ya sherehe na maadhimisho ya Kitaifa, agizo moja (1)

**Mheshimiwa Spika,**

Baada ya kupokea Taarifa ya Utekelezaji wa Wizara Kamati ilichambua hiyo ya utekekezaji na ilikuwa na maoni yafuatayo:

Kamati yangu inaipongeza sana Serikali kwa ujumla wake na hususan inaipongeza Afisi ya Makamu wa Pili wa Rais ambayo ndiyo msimamizi mkuu wa shughuli za serikali kwa kuona umuhimu wa kuzingatia ushauri uliotolewa na Kamati na kuweza kutekeleza maagizo mengi yaliyotolewa na kamati kwa lengo la kuimarisha utendaji kazi katika Wizara hiyo na kuweza kutimiza azma ya Serikali ya kuwaletea wananchi wake maendeleo. Aidha Kamati yangu inaipongeza Afisi ya Makamu wa Pili wa Rais kwa kutambua umuhimu na kuheshimu maagizo ya Kamati hivyo kupelekea kuyatekeleza kwa vitendo dhana ya *check and balance* na kuona namna muhimili mmoja unavyofanya kazi kwa mashirikiano na muhimili mwengine wa dola.

#### **Mheshimiwa Spika,**

Moja kati ya Maagizo ya Kamati yaliyotolewa kwa Afisi ya Makamu wa Pili wa Rais ni Serikali kuongoza Bajeti kwa taasisi zilizochini ya Wizara hiyo ili ziweze kutekeleza majukumu yake ipasavyo. Kamati yangu inapongeza Serikali kwa kuona umuhimu wa kukubali ushauri wa Kamati wa kutaka kuongeza bajeti ya taasisi zilizo chini ya Ofisi ya Makamu wa Pili wa Rais .Tunaweza kusema karibu Idara zote za Ofisi hii zimepata ongezeko la kibajeti katika mwaka fedha 2017/18 ikilinganishwa na ile ya 2016/17.

*Tume ya Kitaifa ya Uratibu na Udhubiti wa Madawa ya Kulevya* imepata ongozeko la aslimia 36 ya bajeti ya mwaka wa fedha 2017/18. Hii inaonesha jinsi gani Afisi ya Makamu wa Pili wa Rais ilivyoweza kulipa umuhimu suala la kupambana na dawa za kulevya ambalo ni janga kubwa kwa jamii na linaloathiri nguvu kazi ya Taifa.

Aidha, Kamati inaipongeza Afisi ya Makamu wa Pili wa Rais kwa kuweza kutekeleza agizo la kuongeza wigo kwa utoaji elimu kwa jamii kuhusu athari za matumizi ya dawa za kulevya ambapo Tume ya Uratibu wa Udhubiti wa Dawa za Kulevya imeweza kuyafikia makundi mbali mbali kwa kuelimisha madhara ya utumiaji wa dawa hizo hatari kwa jamii yetu.Kamati imelithibitisha hili wakati ilipokuwa inafanya ziara mbali mbali kukutana na makundi hayo na kupata ithibati kwa wanamakundi hao kwamba

wamekuwa karibu sana na taasisi jambo ambalo limeleta faraja kubwa kwa Kamati. Pia Afisi ya Makamu wa Pili wa Rais kupitia Tume ya Kitaifa ya Uratibu na Udhhibiti wa Dawa za kulevya imeweza kutekeleza ipasavyo agizo la Kamati la kuzidisha mashirikiano na wadau wengine katika mapambano ya dawa za kulevya zikiwemo, Mahkama, Polisi, Mkemia Mkuu, DPP na Taasisi ya kupambana na Rushwa kwa kuweza kufanya mikutano ya pamoja kwa lengo la kuimarisha mapambano dhidi ya janga hilo.

Hata hivyo bado kamati haijaridhishwa na suala zima la mwenendo wa Kesi zinazohusiana na dawa za kulevya kutokana na kuwa watu wengi wanakamatwa na dawa za kulevya kushindwa kupata hatia mahakamani na kuifanya jamii kutokupata hofu ya kutokuendelea kutenda kosa hilo la usafirishaji na utumiaji wa dawa za kulevya.

### **Mheshimiwa Spika,**

Kamati inashauri kutoa elimu zaidi kwa wadau wote wanaohusika na uendeshaji na usimamizi wa kesi za dawa za kulevya hasa wapelelezi kwani wao ndio msingi wa kujenga kesi kabla kufika mahakamani. Pia suala la usimamizi madhubuti katika mapambano dhidi ya dawa za kulevya nguvu zaidi zinahitajika kwa wadau wote ili jamii iweze kuona kwa vitendo kwamba serikali inalichukulia kwamba mapambano dhidi ya dawa za kulevya ni janga la kitaifa na jamii yote inastahili kushiriki katika vita hivyo.

Mbali na utekelezaji wa maagizo hayo bado Kamati yangu inasisitiza kuendelea kutekeleza maagizo yaliyobaki ambayo yalitolewa na Kamati kwa idara hiyo likiwemo lile la kuimarisha upekuzi wa wasafiri katika vituo vya kuingia na kutoka nchini ambavyo ni viwanja vya ndege na bandari pamoja na lile la kuweka mabango ya tahadhari katika maeneo mbali mbali yenye mkusanyiko mkubwa wa watu, mabango hayo yanatakiwa kuonesha madhara ya matumizi ya dawa za kulevya na adhabu yake kwa mtu atakayepatikana na hatia. Kufanya hivyo kutasaidia jamii kuona kwamba namna gani Serikali yetu ilivyochukua hatua dhidi ya mtu yeyote atakaejihusisha na makosa hayo anavyoweza kuchukuliwa hatua za kisheria dhidi ya uingizaji na utumiaji wa dawa hizo.

**Mheshimiwa Spika,**

*Tume ya Uchaguzi*, katika Tume hii Kamati ilikuwa na maagizo matano (5). Kamati inaipongeza Afisi ya Makamu wa Pili kwa kuanza kutekeleza baadhi maagizo ya Tume ya Uchaguzi likiwemo lile la kupatiwa kiwanja kilichopo karibu na Afisi ya Tume ya Uchaguzi, pamoja na kupatiwa jengo linalomilikiwa na Shirika la Bandari. Hizi ni hatua nzuri zilizoanza katika utekelezaji wa maagizo hayo na ni vyema zikapewa uzito unaostahiki ili kukamilika kwa haraka. Aidha, Kamati imeridhika na maelezo ya Afisi ya Makamu wa Pili wa Rais kwa jitihada iliyochukuwa ya kuyafanyia matengenezo magari ya Afisi ya Tume ya Uchaguzi na kuona umuhimu wa kutenga kiasi cha fedha za kununua gari mpya katika mwaka wa fedha wa 2017/18.

**Mheshimiwa Spika,**

Kamati inaipongeza sana Afisi ya Makamu wa Pili wa Rais kupitia Tume ya Uchaguzi, kwa kutekeleza agizo la Kamati la kuwataka kuandaa vipindi mbali mbali vinavyotoa elimu kwa umma kuhusu kazi na majukumu ya Tume hiyo ikiwa ni pamoja na kueleza historia ya chaguzi za Zanzibar na uwepo wa Daftari la kudumu la wapiga kura. Hata hivyo Kamati imesisitiza kuzingatia muda mzuri wa kurusha vipindi hivyo muda ambao watu wengi wataweza kupata fursa ya kuangalia au kusikiliza ili taaluma ifike kwa watu wengi zaidi.

Aidha, Kamati inaendelea kusesitiza suala la Tume ya Uchaguzi kuwa na Afisi zake katika kila Wilaya ili kuwaondolea usumbufu wananchi wanaohitaji huduma za Afisi hiyo. Kamati inaitaka Afisi ya Makamu wa Pili kulipa uzito unaostahiki suala hilo.

**Mheshimiwa Spika,**

Wakala wa Uchapaji ni Taasisi nyingine iliyo chini ya Afisi ya Makamu wa Pili wa Rais ambayo Kamati yangu ilitoa maagizo manne (4) kwa Taasisi hiyo.

Kamati inaipongeza Afisi ya Makamu wa Pili wa Rais kupitia Wakala wa Uchapaji kwa kutekeleza maagizo ya Kamati kwa lengo la kuimarisha utendaji kazi katika Taasisi hiyo. Miongoni mwa maagizo yaliyotekelezwa vizuri ni lile la kuajiri wataalam wa fani

tofauti katika kutekeleza majukumu ya Taasisi hiyo na kuweza kukabiliana na ushindani wa kibiashara. Aidha kamati inaeleza kuridhishwa kwake kwa kuanza kutekelezwa agizo lake la kujengwa ghala la kuhifadhiwa vifaa vya wakala, ambalo kwa sasa tayari michoro ya ghala hiyo imeshapatikana. Pia Kamati inapongeza jitihada za Wakala za kutangaza kazi zake nje na ndani ya Zanzibar ambapo kamati imeona jitihada hizo za wakala wa Uchapaji pale walipoonesha dhamira ya kushirikiana na wakala wa Shirika la Magazeti ya Serikali Tanzania Bara kwa lengo la kutafuta soko la nje.

Sambamba na hilo Kamati inapongeza Wakala kwa jitihada zake za kujitangaza kupitia vyombo mbali mbali vya habari nje na ndani ya nchi.

**Mheshimiwa Spika,**

Kamati imeridhishwa sana na jitihada za Wizara ya kuzitaka Taasisi zote za Serikali kuchapisha kazi zao katika Wakala wa Serikali wa Upigaji chapa. Hata hivyo Kamati inasisitiza kila Taasisi ya Serikali inayopeleka kazi zake katika wakala kuweza kulipa fedha za kazi hizo kwa wakati.

**Mheshimiwa Spika,**

***Kamisheni ya Kukabiliana na Maafa,*** Kamati yangu inaipongeza Wizara kwa kutekeleza maagizo yake kupitia Kamisheni ya Kukabiliana na Maafa. Moja kati ya maagizo ya kamati kwa Wizara juu ya Taasisi hiyo ni suala zima la kuiongeza bajeti ya Taasisi ili iweze kutekeleza Majukumu yake kwa ufansi Zaidi. Agizo hilo limetekelezwa kwa kuongeza aslimia 43.5 ya bajeti ya 2017/18. Pia Kamati inaipongeza Afisi ya Makamu wa Pili wa Rais kwa kuweza kufungua Akaunti Maalum kwa ajili kupokelea michango ya maafa.

Aidha Kamati inaipongeza Kamisheni ya Kukabiliana na Maafa kwa kuweza kuwa na eneo la kuhifadhi vifaa vya maafa, Hata hivyo Kamati yangu bado inasisitiza suala la kuwa na maghala ya kuhifadhi vifaa vya maafa vya Unguja na Pemba ni jambo la msingi na ambalo lipewe nafasi maalum kwa utekelezaji wake.

**Mheshimiwa Spika,**



Pia Kamati yangu inasisitiza suala zima la kuwa na maeneo maalum ya kuwahifadhi wahanga wakati maafa yanapotokea, Kamati imeliona suala hili ni muhimu sana na Kamati inataka wizara na taasisi husika ziongeze bidii kuhakikisha tunapata eneo kwa ajili ya kuwahifadhi wahanga wakati wa maafa.

**Mheshimiwa Spika,**

*Tume ya Ukimwi*, Kamati yangu inaipongeza sana Serikali Kwa kuwajali wananchi katika suala zima la kujali afya .Kamati yangu ilisisitiza suala la kuwa na Bima ya Afya kwa Wananchi. Kamati imefarajika Sana kuona Serikali imeweza kutekeleza agizo lake hilo na kwa kuanza kuandaa Mswada wa Sheria ya Bima ya Afya. Aidha Kamati inapongeza juhudi zinazochukuliwa na Serikali Kupitia Tume ya UKIMWI Zanzibar katika kutoa elimu kwa umma juu ya maradhi ya UKIMWI na madhara yake, Vile vile Kamati inapongeza kwa jitihada zinazochuliwa kuzisaidia taasisi ambazo zinajishirikisha na mapambano dhidi ya UKIMWI kwa kuzipatia mafunzo pamoja na kuziwezesha kwa kuzipatia fedha.

Aidha Kamati inapongeza juhudi za Tume ya Ukimwi katika kutafuta rasilimali kwa ajili ya utekelezaji wa muitiko wa VVU na UKIMWI nchini ikiwemo kupata wadau mbali mbali muhimu ambao wapo tayari kutoa mashirikiano ya kuendeleza katika mapambano dhidi ya maambukizi ya Ukimwi.

**Mheshiwa Spika,**

Jumuiya ya Watu wanaoishi na VVU (ZAPHA+) ni miongoni mwa wadau wakubwa wa mapambano dhidi ya maradhi hayo. Kamati yangu inaishauri Serikali kuiongezea pia Bajeti Tume ya Ukimwi ili iweze kuisaidia Jumuiya hiyo kumiliki jengo lake la kudumu ambalo lipo karibu na ofisi ya ZAPHA+ iliyopo hapa Unguja na kuweza kuratibu shughuli zao ambazo zinahusu maisha ya watu.

**Mheshimiwa Spika,**

*Idara ya Uratibu wa Shughuli za SMZ*, Kamati inapongeza juhudi ya usimamizi na utoaji wa elimu wa miradi ya TASAF III za kuwa na mpango endelevu wa utoaji wa elimu kwa

walengwa wa program hiyo ambao ni Kaya masikini. Kamati inasisitiza kuwa ni muhimu walengwa wa Programu hiyo kuendelea kuelimishwa kabla ya zoezi la uendeshaji wa miradi kuanza.

**Mheshimiwa Spika,**

Hata hivyo, Kamati imeelezea kutoridhika na hali ya Miradi ya TASAF I NA II ambayo kwa asilimia kubwa ilikamilika lakini baada ya kukamilika baadhi ya miradi hiyo imetelekezwa na kutoendelezwa na taasisi zilizokabidhiwa miradi hiyo ikiwemo Miradi ya visima vya maji safi Wingwi. Hali hiyo imepelekea mradi huo kufa na wananchi kukosa maendeleo yaliyokusudiwa.

**Mheshimiwa Spika,**

Kamati inazitaka Wizara zote ambazo zilikabidhiwa miradi iliyotekelezwa na TASAF hasa TASAF 1 NA II, zitambue kwamba zinawajibu wa kuendeleza na kuisimamia miradi hiyo ipasavyo ili iweze kutoa tija iliyokusudiwa kwa wananchi.

**Mheshimiwa Spika,**

*Idara ya Uratibu wa Shughuli za SMZ- DSM,* Kamati yangu haina budi kuipongeza Serikali kwa kuchukuwa jitihada za makusudi za kutaka kuboresha jengo la SMZ la Dar es salaam kwa kuonesha dhamira ya Serikali ya kulijenga upya ni nzuri na yakupongezwa, hata hivyo suala pekee la kuliangalia hivi sasa ni kuhakikisha kwamba jengo hilo lipo katika hali nzuri ili lisiendeleo kuharibika kabla ya kuanza kwa ujenzi uliokusudiwa.

**Mheshimiwa Spika.**

*Idara ya Watu wenye Ulemavu,* Kamati inaipongeza Serikali kwa kutambua mchango wa watu wenye ulemavu kwa kuwaongezea fedha katika bajeti ya 2017/18,

Aidha, Kamati inaipongeza sana Afisi ya Makamu wa Rais kwa kuipatia Idara gari moja na fedha kwa ajili ya vifaa vingine vya kuimarisha utendaji kazi. Vile vile Kamati inaipongeza Wizara kupitia Idara ya watu wenye ulemavu kwa kuweza kuandaa dodoso la kubaini majengo ambayo hayana miundombinu rafiki kwa watu wenye ulemavu. Kazi

hiyo ni ya kupongezwa na ya kuungwa mkono ili watu wenye ulemavu nao waweze kuzifikia huduma kwa urahisi pale wanapohitaji huduma hizo katika majengo mbali mbali

Aidha Kamati yangu inaipongeza Ofisi ya Makamo wa pili wa Rais kwa kuhakikisha kuwa Wizara ya kazi, Uwezesaji, Wazee, Vijana, Wanawake na Watoto inaiwezesha Idara ya watu wenye ulemavu kupitia vikundi vidogo vidogo kwa kuwapatia mikopo na kuweza kuendesha shughuli zao za kiuchumi. Ofisi hii imekuwa ikishirikianana na Wizara ya Kazi katika kuhakikisha kuwa watu wenye Ulemavu wanapewa kipaumbele maalum katika huduma zinazotolewa na Wizara hiyo.

**Mheshimiwa Spika,**

Kwa upande wa Idara ya Sherehe na Maadhimisho ya Kitaifa, Kamati inaipongeza sana Wizara kukubali ushauri wa Kamati wa kuongeza Bajeti ya Idara hiyo ili iweze kununua vifaa mbali vya kisasa ambavyo vitatumika katika sherehe za kitaifa.

**Hitimisho:**

**Mheshimiwa Spika,**

Baada ya maoni hayo ya Kamati ambayo nimejaribu kuyaelezea yameweza kuakisi kwa kiasi kikubwa hali halisi ya utekelezaji katika Wizara ya Nchi Ofisi ya Makamu wa Pili wa Rais ni imani yangu kuwa taarifa hii ya Kamati ya Kusimamia Ofisi za Viongozi Wakuu wa Kitaifa yatasaidia sana kuimarisha utendaji katika Wizara hiyo. Hivyo; nawaomba wajumbe wengine wa Baraza lako tukufu, waichangie vyema taarifa hii, kwa lengo la kupata utekelezaji bora wenye maslahi kwa wananchi wetu.

Mwisho kabisa, napenda kukushukuru tena, wewe binafsi, **Mheshimwa Spika**, kwa kunipa nafasi ya kuwasilisha taarifa ya Kamati yangu kwa niaba ya Kamati, pamoja na kuwashukuru Wajumbe wa Baraza lako Tukufu kwa kunisikiliza kwa umakini mkubwa, sasa niwaombe Wajumbe wa Baraza lako waijadili ili wamuwezeshe Waziri kufanikisha kazi zake kwa ufanisi mkubwa .

**Mheshimiwa Spika,**

Kwa niaba ya Kamati ninayoiongoza ya Kusimamia Ofisi za Viongozi wakuu wa Kitaifa naomba kuwasilisha.

.....

**OMAR SEIF ABEID**

**Mwenyekiti,**

**Kamati ya Kusimamia Ofisi za Viongozi Wakuu wa Kitaifa,**

**Baraza la Wawakilishi,**

**Zanzibar.**